

■ CONVIVENZA

Da pizzas, parter e quints da fracziun

DA VIOLA CADRUVI*

A tgnamain na duess jau gea betg pli esser surstada dals characters curius da mes amis. Tgi che sa sumeglia s'accumpogna gea enconuschentamain. Ma mintgatant sun jau lura tuttina puspè schoccada. Uschia era l'emna passada. Jau sun m'entupada cun trais amias e nus avain vuli empustar pizza. Il studi da la carta ha cuzzà in detg temp. Las pussaivladads èn gea er infinitas: Prosciutto, Vegetariana, Napoli, Quattro Stagioni, Quattro Formaggi, Tonno, Salame... Cura che tuttas han lura gi inditgà lur preferenzas ha ina ditg tuttenina: «Ah, ma nus empustain bain mo trais pizzas, u betg? Nus pudain gea parter.» In mument èsi stà quiet. E lura, avant ch'jau hai pudì opponer, han tshellas duas dà dal chau: «Naturalmain!» e «Cler, in'entira pizza è sovisto adina memia bler.»

Tge?! Jau sun stada schoccada. Per betg dir consternada. In'entira pizza n'è segir betg memia bler! Perquai ha ina pizza gea exact questa grondezza e quella è dapertut en Svizra pli u main la medema: fatga exact per ina persuna. E betg mo quai, i vala era da resguardar ils problems che sa dattan cun parter trais pizzas sin quatter persunas. Cler, tgi ch'è stà attent en scola primara sa che



quai fa per mintga persuna trais quarts d'ina pizza. Tant lunsch, tant simpel.

Ma lura vegn vitiers la cumposiziun da la grupp. Nus avain duas vegetarias. Quai simplifitgescha zuar a prima vista la situaziun perquai ch'ins sa ch'ins sto empustar almain duas pizzas vegetaras. Dentant less almain ina da las «vegis» tuttina «sagiar» la Pizza Prosciutto. Il quint sa cumplitgescha. Ins sto era resguardar ch'ina n'ha segir betg gugent ils funghis che sa chattan sin la Quattro Stagioni – per il solit quella ch'avess da prender in quart da mintga pizza. Già chattar ina clav da distribuziun da las trais pizzas è pia ina sfida. E ch'i vala da distribuir quella sin quatter persunas – da las qualas almain ina (numnadamain jau) vegn enorm malidia, sch'ella ha fom – na fa betg pli simpla la chaussa.

Naturalmain avess jau pudì far opposiziun, far la fomentada, il ruina-

giu, ma gliez na leva jau lura era betg. Jau hai sovisto il bul da la magliadruna en questa runda. Era n'avev jau l'ultima giada betg fatg puncts cun mia reacziun cura che mia amia aveva sgrattà giu il chaschiel da la pizza. Spira sgarschur fiss anc formulà bainvulent. Cler, la pizza nudava en il grass, ma in e scadin sa ch'il chaschiel è il meglier vi d'ina pizza. Là vom jau d'accord cun ils Americans: pervia da mai pudess ins er anc emplenir l'ur da la pizza cun chaschiel.

Jau hai pia tegnì la bucca e fatg bella tschera. Jau stoss la finala esser leda che mias amias n'èn betg talmain barbaricas ch'ellas empostan ina Pizza Hawaii u sumegliant. Gliez fiss lura propi stà memia bler. E natiralmain han ellas era raschun: trais pizzas èn stadas avunda. La fom è stada dustada e nus avain anc gi plaz per in dessert. Ma tuttina. La proxima giada propon jau dad empustar kebab. Là na vegnan ellas bain betg sin l'idea da parter. Sper jau almain.

*** Viola Cadruvi ha studegià germanistica, istorgia e rumantsch a l'Università da Turitg. Mintgatant lavura ella vi da sia dissertaziun e mintgatant sco scolasta, ma bunamain adina scriva ella.**

La convivenza da las linguas e culturas è il tema da las columnas sut il ti-tel «Convivenza» che vegnan publicadas mintga glindesdi en las gasettas La Quotidiana e «Südüstschweiz».